



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir\_yimyim



tir yimyim

TAPAK 7

### Foreign Secy, Vikram Misri-i Bangladesh semdangtsü

### Ukraine nung tamakok majurutsü atema mera ajak agitsü: Lavrov



VOL. XXII ISSUE NO. 58 (ADOK 58) DIMAPUR

KÜPTOKNÜ (SATURDAY)

LUCHII (DECEMBER) 07, 2024

₹ 5.00

## Tesüiba sorkartemi NE senzuka yutsü: PM Modi

New Delhi, December 6, 2024

(Agencies): Tesüiba sorkartemi votes den terenlok medemdanga inyak aser iba jagi northeast asoshi temulung magütsü ta Prime Minister Narendra Modi-i tanü ashi.

Northeast nung nütsüung yongsük aser votes ajema aliba agi tesüiba sorkartemi temulung magütsü, ta pai ashi.

Northeast nem tetushi agüja Ashtalakshmi Mahotsav lapoktsüdang "Atal Bihari Vajpayee sorkari northeast atema mezüung ministry balaka tentettsü aser ministry shiai northeast atema 20% lemezüksür" ta PM Modi-i ashi.

"Tesüiba küm 10 tsüingda asenoki northeast kanga renlokba nguogo saka iba ya inyaktsü tasak liasü. Onoki India renlokba nung northeastern state tem sendakteptsü atema akokba tashi meratem agiogo" ta pai ashi.

"Mapang talangka asenooki votes repranga terenlok mapa inyakba nguogo. Northeastern state tem nung votes tajemba aser menden ishika dang liasü, anungji tesüiba sorkartemi northeast renlokdahtsütsü atema temulung magütsü" ta PM Modi-

isa ashi.

"Tarutsü anogotem Eastern India aser Northeast kanga renloka aotsü. Mumbai, Hyderabad, Chennai aser Bengaluru ama Guwahati, Shillong, Imphal, Itanagar aser Aizawl yimitem akümtsü" ta paisa ashi.

Northeast nung sobaliba takar aser nisung teyakyak aliba ajanga India renlokba nung teyari kanga angutsü. Tesüiba küm ter tsüingda ozü sorkari Delhi aser northeast den 'Dil' ongdang tangatetba agientsü meranga aruogo ta Modi-isa metetdaksü.

Tesüiba küm 10 tsüingda Union minister temi northeast 700 ben semdangogo aser ozü sorkari iba tesem sendakteper, ta paisa shisem.

Mezüngbuba Ashtalakshmi Mahotsav ya December 6 nungi 8 tashi Bharat Mandapam nung amonger.

Iba benjung ya northeastern state 8- Assam, Arunachal Pradesh, Meghalaya, Manipur, Nagaland, Mizoram, Tripura, aser Sikkim tobur ajungba aser nisung temeyoktep aliba sayur. State 8 ya senteper 'Ashtalakshmi' ta ajar.

## Buyers & Sellers Meet 2024 ayonga agiogo

Dimapur, December 6, 2024

(TYO): December 6, 2024 nü Bamboo Hall, Kisama nung Department of Industries & Commerce-i Buyers & Sellers Meet 2024 ayongzüka agiogo.

Iba sentong ya shishilembatsü atema tesentaktep yanglutsü aser Nagaland nung local buyers & sellers sendakteptsü nükjidong nung agi.

Iba sentong nung Industries & Commerce Advisor, Hekani Jakhalu-i tetushi süa jaoker ka o jembidang Nagaland nung entrepreneur wadang renloktsü atema ibala mesükba sentongtem inyaktsü ashi.

Nagaland ya lanur state ka lir aser entrepreneurship aser business tang ang ainer. Ajisüaka tanü nisungtemi start-up sobaliba kanga inyakdar, ta Hekani-i ashi.

"Nagaland nung market ano meinlok aser temerük lir anungji iba ama mapang ka nung shishilembatsü tenzükba nung tajangzük keta lir. Nagaland sorkari entrepreneur wadang nung buyers aser sellers maneni yaritsü. Iba sentong nung tesentaktep yangluba ajanga state atema dang masü saka

linük rongsenketzüng nung shilem agitsü" ta laisa ashi.

Sentong nung Industries & Commerce Secretary, Shanavas C, IAS-i Raising and Accelerating MSME Performance (RAMP) maparen indang lemsatop.

"RAMP ya India sorkar sentong ka lir aser iba kübok buyers & sellers meet ya ayongzüka agir. Nagaland nung tayongzükba aika lir saka item tayongzükba ya maongka ama züngshitsü ayongzük" ta Shanavas-i ashi.

Nagaland nung tashi tongtipang kaji sempet aketba lanurtem lir. Naga nung lanurtemi mapa meranga inyaker aser teka mapa kanga tajung lir, ta paisa ashi.

Nagaland nung handloom, handicrafts, aser food products wadangtem asoshi lenmang tesadem lir anungji nisungtemi item maongka agitsüla, ta Industries & Commerce Director, P. Tokugha Sema-i ashi.

Buyers & Sellers Meet 2024 nungsa Business-to-Business (B2B) meeting aser feedback session ka liasü.

## 25 buba Hornbill Festival nung nisung lakh 1 tema denogo



Hornbill Festival anogo trokbuba Cultural Extravaganza anepdang session nung Host NLA Speaker Sharingain Longkumer aser Co-host Advisor A. Pangjung Jamir nati Mizoram Governor Dr. Hari Babu Kambhampati nem sempet agütsüdang agiba noksa angur. (Kohima, December 6)

Kohima, December 6, 2024

(TYO): Naga Heritage Village Kisama nung 25 buba Hornbill Festival amongdang nisung lakh 1 temai shilem agiogo.

Taküm benjung tenzük anogo trokbuba nung nisung 14,856 arua liasü aser parnok züngsema nisung ajak agi 1,01,496 jungogo.

Tang tashi nung Kisama nung benjung arurtemji foreigners 1912, domestic tourists 26,549 aser locals 70,035 liasü.

"Anogo 6 buba nung nisung 14,856 arua liasü aser parnok ya foreigners 197, domestic 4003 aser locals 10,656 liasü" ta Tourism Department Joint Director, Toka E. Tuccumi-i ashi.

Tangtashi nung nisung teimtiba aruba anogoji mezüung anogo nisung 23,910 aruba liasü. Nisung tajemtiba aruba anogoji anogo pezübuba nü 14,502 aruba liasü.

Hornbill Festival nung Cultural Connect sentong nung kin balalai shilem tajung agiogo. Tanü session asem lemsar

agia liasü aser anepdang session nung Nagaland Legislative Assembly (NLA) Speaker Sharingain Longkumer host liasü aser Fishery & Aquatic Resources Advisor A. Pangjung Jamir-i co-host ama shilem agi.

Iba session nung Mizoram Governor Dr. Hari Babu Kambhampati aser Head of Regional Delegation, South Asia, ICRC, Geneva Kedir AWOL Omar nati tetushi süa jaoker ama shilem agi.

Anüingdang aser nikongdang agiba session nung Deputy Chief Minister, Yanthungo Patton-i host aser Youth Resources & Sports Advisor S. Keoshu Yimchunger-i co-host ama shilem agia liasü.

Session anaprong nung Director General, AR, Lt. Gen. Vikas Lakhera, AVSM, SM, aser Director (A&F), NHIDCL Anshu Manish Khalkho nati tetushi süa jaokertem ama aden.

Kin balalai shilem agirtem: Konyak Cultural Troupe: We Pheak Wante Lokpu Hem . Lotha Cultural Troupe:

Eramoren Oli Ejon.

Ao Cultural Troupe: Tsüksenba.

Garo Cultural Troupe: Warping Sika Game.

Angami Cultural Troupe: Liephie Pfhe.

Tikhir Cultural Troupe: JihSho Ooh (Mülong Sütok Kin).

Sumi Cultural Troupe: Amalimi Kuphulu.

Chakhesang Cultural Troupe: Rekhu Kha.

Khiamniungan Cultural Troupe: Eioh Yoah.

Kuki Cultural Troupe: Lom Lom.

Zeliang Cultural Troupe: Kalang Kathiubo.

Kachari Cultural Troupe: Bai-Majjai.

Yimkhiung Cultural Troupe: Indigenous top-spinning.

Rengma Cultural Troupe: Song.

Sangtam Cultural Troupe: Kijing Khi.

Pochury Cultural Troupe: Asangsolio.

Phom Cultural Troupe: Chingsang Songola.

## NBSE-i Central scheme PM-VIDYALAXMI indang metetdaksür

Dimapur, December 6, 2024

(TYO): Union Cabinet-i December 6, 2024 nü Central Sector Scheme PM-Vidyalaxmi mulunga agizükogo ta Nagaland Board of School Education (NBSE)-i metetdaksü.

PM-Vidyalaxmi ajanga India nung top 860 quality higher education institutions (QHEI) nung admission anguba kaketshir tajungtem nem free education loans agütsütsü. Kümshia item HEIs nung kaketshir lakh 22 tema admission asür anungji PM-Vidyalaxmi ajanga parnok

tajangzk angutsü, ta NBSE Chairman-i ashi.

Külen, Rs. 8 lakhs tashi anguba kibong nungi kaketshirtemi 3% interest subvention angutsü. Iba ya Rs. 7.5 lakhs tashi sen apoba atema credit guarantee cover dak alia lir.

PM-Uchchar Shiksha Protsahan (PM-USP) Scheme kübok Rs. 4.5 lakhs tashi anguba kibongtem nungi technical courses kaketshirtem full interest subvention agütsür. Anungji PM-Vidyalaxmi aser PM-USP külemi

India nung HEIs tajungtem nung azüngba kaketshirtem yaritsü.

Department of Higher Education-isa PM-Vidyalaxmi portal yanglur aser iba ajanga iba scheme tashishitsü melii aser zübazüba inyaktsü. PM-Vidyalaxmi Scheme ajanga school kaketshirtemi higher education azüngtsü tali jangradaktsütsü.

Iba osang ya Heads of Institutions ajaki kaketshirtem nem metetdaksü mepishir, ta NBSE Chairman-i metetdaksüogo.



## Mokokchung nung World Soil Day amung



**Dimapur, Luchii/December 06 (TYO):** Department of Soil and Water Conservation, Mokokchung ajanga Krishi Vigyan Kendra (KVK), Mokokchung aser NABARD, Mokokchung den lungjemer World Soil Day aser Krishi Swarna Samridhi (KSS) week munga liasü.

Aliba ajunga nung taküm World Soil Day ya "Caring for Soil: Measure, Monitor & Manage" omen kübok munga liasü.

Iba sentong nung Mokokchung district kübok yimtsüng pezü nungi iba sentong nung shilem agia liasü, kong menden Tokiho Achumi ACTO (Agronomy) ajanga tongtipang nisung aser shilem agirtem pelashishia agizüka liasü.

Dr. Keviletsu Khate Sr. Scientist & Head, KVK Mkg ajanga iba anogomung rateta jembidang KVK ajanga tang teinyakdak mapatem aser küm 50 tashi inyakyonga aruba indang tongmelang agi rasaa ashi.

Pai aluyimer dang Kisan Sarathi App amshitsü ayongzük, koba digital smart phone ajak nung angur. Kisan Sarathi App ya aluyimer yaritsü asoshi online sapang ka lir.

Omen nung ajemdaker E Precila Patton SDO (C) Changtongya ajanga jembidang ali anema alitsü koda tongtipang ta asüba indang sayu aser ali temu wazüka ayutsü asoshi anepaluyim indang shisatsü agüja liasü.

Imtilemla, ACTO (Soil Sc.)

ajanga Aliba yimtsüng nungi aluyimer nem Soil Health Card lema agütsü aser Poji, DDM NABARD Mkg ajanga agency aser department teyari amshia marketing strategies yanglutsü indang lemsatop.

Aluyimba nung tajanzük tajung alitsü asoshi department balala lungjemer inyaktsü tongtipang lir ta pai ashi.

Iba sentong nung shilem ka ama ak metsüba tesem ka aser vermicompost unit ka semzüka liasü aser Dr. Sarendi Walling ACTO (Animal Sc.) ajanga melepzüng jembia liasü.

World Soil Day nung shilem ka ama GMS Mangkolemba nung azünger atema quiz aser essay competition ayongzük aser aluyimer nem Soil Health Card agüja liasü.

## NFHRCC-i ajungben rongdak senden ka ayonger

**Dimapur, Luchii/December 06 (TYO):** NFHRCC ajanga Khen Mahal, Dimapur nung aliba office nung December 7, 2024 anepdang 10:00 ako nungi ajungben rongdak senden ka ayonger, ta NFHRCC convenor Supu Jamir aser assistant general secretary Chenithung Humtsoe nati sangdong ka ajanga ashi.

Ajaki yongya ataba Foothills Road yanglutsü atema Work Order agütsüba dak sendakba nung iba senden ya jazüksüsa

akumer, anungji Committee züngsem ajak medema arua adentsü ayongzük, ta sangdong ajanga ashi.

Iba den külemi 2 Lane Foothills Road yanglutsü atema contractors nem Work Order agütsüba dak sendakba nung State sorkar nem anogo pezü tsüngta inyaktsü mapang latettsüba agiener, kechiaser NPWD, Road & Bridges ajanga onoki akhangba ama inyakogo, ta sangdong ajanga ashi.

## Ao Senden Sanen Luden ajungben senden ka jateper

**Dimapur, Luchii/December 06 (TYO):** Ao Senden indang Sanen Luden ajungben rongdak senden ka December 9, 2024 anüngsang 11:00 ako nungi tenzuka Aor Kilem,

Mokokchung Town nung jazüker, ta Ao Senden sangdong ka ajanga ashi.

Anungji züngsem ajak iba senden nung arua adentsü ayongzük, ta sangdong ajangasa ashi.

## Mangkolemba nung shisadokden senden ka amen

**Dimapur, Luchii/December 06 (TYO):** Republic Day 2025 atema sentong yanglutsü asoshi shisadokden senden ka Dec. 6, 2024 nü ADC Mangkolemba indang Conference Hall nung mena liasü.

Iba senden nung Republic Day dak sendakba nung

department balala nem mapa lema agütsü aser ano sentong tali atema jembishinüa liasü.

Iba senden ya ADC Mangkolemba, Moakumzuk Tzudir lenisüba kübok agi, kong Mangkolemba jila nung aliba Heads of Offices tem dena liasü.

## VBDAN ajanga Kisama nung blood donation camp ayongzük

**Dimapur, Luchii/December 06 (TYO):** Voluntary Blood Donors Association Nagaland (VBDAN) ajanga lokti tentet balala den lungjemer December 6, 2024 nü 25 buba Hornbill Festival nung shilem ka ama Naga Heritage Village, Kisama nung blood donation camp ka takok ngua ayongzük.

Mozüki balala nung aliba blood banks tem nung azü tali bendentsü nükjidong nung iba sentong ya ayongzüka liasü.

Iba camp ya Indian Red Cross Society Nagaland, HDFC Bank, Canara HSBC Bank (Life Insurance), Blood Centre

NHAK, Imagi.NATION, 13th Assam Rifles, 164 TA Naga, Imprint aser 5th Note den külemi teka amteper ayongzük, kong 164 Territorial Army aser 13 Assam Rifles nungi nisung 25 arua azü agüja liasü.

Iba sentong nung Bendang Imsong, Advisor, VBDAN menden liasü aser Lujeka Assumi, Associate Pastor, SBCK ajanga sarasadema tenzük.

Burakum, President, VBDAN ajanga pela agizükba o jembi aser Ainato Yeptho, Chairman, VBDAN ajanga melepzüng o jembia liasü.

## CIHSR Campus nung Short Film Screening sentong ayongzük

**Dimapur, Luchii/December 06 (TYO):** Nagaland Art Centre ajanga Department of Information and Public Relations (DIPR) den lungjemer 25 buba Hornbill Festival nung shilem ka ama Short Film Screening sentong ka December 5 & 6, 2024 anogotem LG Hall, CIHSR Campus, 4th Mile, Chümoukedima nung ayongzüka liasü.

Iba sentong ya Sedevi Angami, Director, CIHSR ajanga moatsü aser The Nagaland Art Center ajaga Department of Information & Public Relations (DIPR) aser CIHSR den lungjemer iba short film screening sentong ayongzük ta ashi.

Northeast nung rangloker alima tesem balala nungi short

films tem shimteter iba sentong nung sayua liasü.

Nagaland Art Centre nguteter M. Ababe Ezung aser Sentienla Pongen Ezung nati maneni asen region indang sobaliba senmang art aser film ajanga sayur, ta pai ashi.

Iba sentong nungsa The Nagaland Art Center ajanga lapoktsü aliba theatre, Meyitsiiloo indang osang lemsatopa liasü, kong short films, documentaries aser danga cinematic productions tem sayutsü.

## District Headquarters ajunga nung National Lok Adalat alitsü

**Dimapur, Luchii/December 06 (TYO):** Tanungba India linük tesem ajunga den külemi 2024 küm atema 4th Quarterly National Lok Adalat (People's Courts) ya Nagaland State Legal Services Authority (NSLSA) kübok district headquarters ajunga nung December 14, 2024 nü alitsü.

Iba mapang District Legal Services Authority (DLSAs) ajanga Lok Adalat Benches 11 amenoktsü.

Legal Services Authorities Act, 1987 aser National Legal Services Authority (Lok Adalats) Regulations, 2009 in the Courts and Tribunals nung aliba ama State Legal Services Authority kübok District Legal Services Authorities (DLSAs) aser High Court Legal Services Committee (HCLSC) ajungai küm ka nung National Lok Adalats pezü ben agia arur.

Yangji shia aliba ama ken o jembitsü aser National Lok Adalat mamendang pre-Lok Adalat mesüra pre-conciliation sittings alitsü atema nungdakba totuyuba agütsütsü, aser ibaji ajanga tangatetep kati arutsü asoshi maongka agütsütsü.

National Lok Adalats mapang pre-litigation aser pending cases tem benoka jembir, aser yangji National Insurance Act cases under Section 138; Money Recovery cases; Motor Accident Claim cases; Labour dispute cases; Disputes related to Public Utility services such as Electricity & Water Bills cases etc. (excluding non-compoundable); Matrimonial disputes (except divorce)/ Family disputes, Land Acquisition cases; Service matters including pension cases; Revenue and other

ancillary matter amala High Court, district Courts and state/district/taluka authorities, IPR matters/ Consumer matters/ aser danga quasi-judicial authority matsüngdang mebenteti anendaka aliba ken o tem ajak jembitsü.

Iba dak sendakba nung osang tejangja metetner temi District Court permits nung aliba Front Offices mesüra Office of the NSLSA, Top Floor, NPA Building, DC office compound, Kohima nung asüngdangtsü mesüra toll free NASLA Helpline 15100 mesüra NSLSA Helpline number-9118003453883 mesüra email nslsa.nagaland@yahoo.in ajanga tongteprateptsü akok.

DLSAs shia indang disposal data ya maneni state authority indang web portal nslsa.nagalandgov.in nung upload sütsütsü.



NSF Solidarity Park, Kohima nung December 6, 2024 nü State Level Rice Husking Competition alidang tangokba noksa ka yangi angur. Iba sentong ya Department of Tribal Affairs, Nagaland kübok Tribal Research Institute Nagaland ajanga ayongzüka liasü.

**ALI AYOKER**

Doyapur ataba lenmang nung Diezephi aser Ura na tsüngda alumang tuluka jenjang dalang agi lepsaa ayoker.

Direct Contact

9612846178 / 8837273643



# 'Delhi Chalo' march nung shilem agir aluyimertem nokdang



December 06, 2024 nü Punjab kübok Patiala district nung Shambu arrtsülen aluyimertem Delhi-i longkak aita aodang sepaitemi parnok nokdangtsü atema tear gas khaloktsüba mapang tangokba noksa nung angur.

**New Delhi, December 06 (Agencies):** Greater Noida nung 'Delhi Chalo' march nung shilem agir aluyimertem dak police-i tear gas khaloktsü aser aluyimer 30 shi apu.

Aluyimertemi Minimum Support Price (MSP) atema legal guarantee aser aluyimertem dang sentsüh atoktsü densema takhangba balala agütsür.

Hokolbarnü aluyimertemi Delhi Chalo march agia Delhi tsütsüleni aodang Shambhu arrtsülen sepaitemi parnok nokdanga liasü.

Aluyimertemi Punjab aser Haryana na tsüngda Shambu arrtsü adena aotsü merandang parnok tsüngda rara adok.

Aluyimertem senshidaktsütsü atema Haryana Police-i parnok dak tear gas khalokja liasü.

Aluyimertem lenir, Sarwan Singh Pandher-i ketdangsertem dang Delhi tsütsüleni aotsü atema aluyimertem nem temelaba agüjang mesüra aluyimertem takhangba onük nung o lemteptsü atema senden ayongzükang, ta takhangba agütsü.

"Ken o jembitsü atema aluyimertemibo melunga lir," ta pai osangbenertem dang ashi.

Central sorkar dang pai, "Onoki akhangba onüktem Central sorkar nem agizükdaktsüner. Delhi nung longkak aittsü atema onok nem tesem ka lemezüktsütsüla.

Ambala nung Internet services agütsütsüla," ta metetdaktsü.

Aluyimertemi longkak aitba nung ajemdaker ketdangsertemi Ambala district nung tenokdangba aika benoka lir aser yimti tesem aika nung internet services shibangja lir.

Olulu prokba nokdangtsü atema Ambala district kübok Dangdehri, Lohgarh, Manakpur, Dadiyana, Bari Ghel, Lharsa, Kalu Majra, Devi Nagar, Saddapur, Sultanpur aser Kakru yimtsüngtem nung December 6 nungi December 9 tashi internet shibangtsüogo, iba dak alia dongle-based internet services-a nokdang. Item tesem nung voice calls dang melar.

# Foreign Secy, Vikram Misri-i Bangladesh semdangtsü



**New Delhi, Luchii/December 06 (Agencies):** December 9 nü Foreign Secretary, Vikram Misri-i Bangladesh semdangtsü aser Bangladesh Foreign Secretary den senden amentsü, ta Hokolbarnü ministry of external affairs (MEA) otongdar, Randhir Jaiswal-i metetdaktsü.

Misri-i Bangladesh semdangba mapang nung senden aika ayongzüka amentsü.

Bangladesh nung Hindu nungertem aser Hindu nunger tekülem kitem amakba ajanga linük ana tsüngda tesendaktep mejungi aliba mapang ka nung pai iba linük semdangtsü.

August 5 nü Bangladesh nung Sheikh Hasina-i aniba sorkar chirepba sülen lai linük toktsür jena ao. Iba mapang nungjagi tenzüka Bangladesh nung Hindu nungertem anema inyakba kanga bulua ataloker. "Foreign Secretary-i December 9 nü Bangladesh

semdangtsü aser Foreign Secretary ajurua senden amentsü. Pai senden aika ayongzüka amentsü. Foreign Secretary leniba nung India aser Bangladesh ketdangsertem senden amentsü. Iba senden amentsü atema onoki yongyar," ta Hokolbarnü Jaiswal-i osangbenertem nem metetdaktsü.

Mongolbarnü Bangladesh-i Agartala aser Kolkata high commissions nung tongti ketdangsertem Dhaka-i jaoka liasü. Iba ya ajanga Bangladesh nung Yunus-i aniba sorkar aser India na tsüngda tesendaktep mejungi aliba kuli sayur.

Kolkata nung Acting deputy high commissioner of Bangladesh, Shikdar Md Ashrafur Rahman aser Tripura

nung assistant high commissioner, Arifur Rahman na dang Mongolbarnü Dhaka-i meyipa arung, ta tuyua liasü.

Bangladesh nung yimtenren tashi meiti aliba mapang ka nung Hindu nungertem anema inyakba kanga bulua ataloker.

Iba dak alia Bangladesh nung ISKCON putir Chinmoy Krishna Das apuba ajanga ano tensa tamajungba dang kümogo. Das-i sentong ka nung Bangladesh nunger linük wako mezüngmeshi ta pa nem tai tonglokja October ita nung pa Dhaka airport nung lia puogo.

Bangladesh nung Hindu nungertem anema inyakba anema longkak aitemi Agartala nung Bangladesh assistant high commission kakkoka atu.

# Menungra Bilemteter



ASÜR MR. BENDANGKOKBA LONGKUMER (Merangkong) 07/12/2023

Temeim Oba nai onok toktsür orr tanü küm ka ajunger. Saka nü Temeim temoatsü aser shisatsü tajung anogoshia menungra bilimteter. Oba na onok mulungjang nung teti lir aser na Tsüngrem den anisüngzük dak lir ta amanga onok mulungjang süngzükter.

~ Temeim Kenungtsü, Chirnur aser kinüngertem.



New Delhi, December 06, 2024: Dr. B.R Ambedkar asüba anogomong nung Parliament House nung linük tatong Tir Jagdeep Dhankhar, Ato kilonser Narendra Modi, taoba mapang linük Tir Ram Nath Kovind, Lok Sabha Speaker Om Birla, Union Minister Kiren Rijiju, Rajya Sabha nung Opposition lenir Mallikarjun Kharge aser tangartemi B.R. Ambedkar nem akhüm agütsüdang tangokba noksa nung angur.

# Opposition-i Parliament kima Gautam Adani anema longkak ait

**New Delhi, December 06 (Agencies):** Hokolbarnü Congress leniba nung Opposition MP tem aikati Parliament complex telung nung Gautam Adani anema longkak aita masks tanak agir longkak aita jaja; mask nungji "Modi Adani bhai bhai" ta zülua liasü.

Opposition INDIA teloktep nung aliba party kar nungi MP temi linük temzüng kakat amer industrialist Gautam Adani anema yimyim ayima longkak ait.

Longkak aitba nung shilem agiba party tem rongnung RJD, JMM aser left parties densema liasü. TMC aser Samajwadi Party nungi MP temibo shilem magi aser tang tashi nungbo parnoki Adani maitsür, ibayongji ruling Bharatiya

(BJP)-i opposition teloktep nung telemsa adoka lir, ta züngshir. Longkak aita jajartem rongnung Lok Sabha nung Opposition lenir Rahul Gandhi aser teno Priyanka Gandhi Vadra nata densema liasü.

Tesülen osangbenertem den jembidang Priyanka-i, Adani indang ken o jembitsü atema sorkari tsübur, ta metetdakja liasü.

US court ka nung Adani aser company ketdangsertem aitsüba sülen Congress densema opposition party aikati Joint Parliamentary Committee kati Adani Group anema bushisüngdangtsü takhangba agütsür.

Rahul Gandhi-ibo, Adani aputsüla, ta takhangba agütsüogo.

**प्रगत संगणन विकास केंद्र, कोलकाता**  
**CENTRE FOR DEVELOPMENT OF ADVANCED COMPUTING, KOLKATA**  
 सकार एव सुचना प्रौद्योगिकी मंत्रालय की वैज्ञानिक सखा, भारत सरकार  
 A Scientific Society of the Ministry of Electronics and Information Technology, (MeitY), Govt. of India

**Expression of Interest**  
 Ministry of Electronics and Information Technology (MeitY), Govt. of India kübok R&D organization ka- Centre for Development of Advanced Computing (C-DAC) Kolkata, Plot- E2/1, Block-GP, Sector-V, Salt Lake Electronics Complex, Bidhan Nagar, Kolkata-700091-i tejangrar parties/Entrepreneurs dang "CG-STAT"- aou lanu nung cyanogenic glycoside putettsü atema amshiba teka agi amba instrument indang Transfer of Technology (ToT) atema "Expression of Interest (Eol)" meshir. Osang tejangjaba metettsü atema [www.cdac.in](http://www.cdac.in) nung repringang. 9477355692 / 9405138189 ajanga metetpelatsü akok. Eol agizüktsü atema tatembangbuba anogoji **26/12/2024 nikongdang 5:00 ako** asütsü.

CBC : 06147/12/005/2425

**Government of India**  
**Ministry of Youth Affairs and Sports**  
**Department of Sports**  
**Appointment of Vice-Chancellor in National Sports University, Manipur (A Central University)**

National Sports University, Imphal, Manipur nung Vice-Chancellor post atema temsüa alir candidates dang nung application meshir. Iba post atema nungdakba qualifications, telatetbatem, osangtsüsang, application proforma aser tanga osang tejangja ajak Ministry of Youth Affairs & Sports indang website [www.yas.nic.in](http://www.yas.nic.in) nung angutsü.

Agüja aliba format nung terenemjem applications ji iba advertisement adokba anogo nungi tenzüka anogo 30 tsüngda Registered/Speed Post ajanga **Shri. Sandeep Kumar Sinha, Deputy Secretary, Hall no. 101, JLN Stadium, Lodhi Road New Delhi- 110003** ket tongtsütsüla. Lemzükja aliba anogo süiadokerbo applications ji magizüktsü.

Offline applications dang agizüktsü. (Online applications magizüktsü).

CBC : 47116/12/0006/2425





## TIR YIMYIM YIMOBILEM (EDITORIAL)

DIMAPUR

KÜPTOKNÜ

LUCHII 07, 2024

### Benjong sapuba Jack !

**A**sen lima agi benjong lima kuma amongba ya junger, kechiyong benjong nungbo mapa meinyaki shi ango den chiyongtepa pelateper. Ashiko, ibaji kotak lima danga tajungba asütsüa akok kechiyong kotak nungbo shi ango mangutsü aser mechiyongtsü kechiyong mayatsü ta ashir. Aji oda, tang Kisama nung amongba Hornbill benjong ya dang masü saka asenok sobaliba benjong dak alaka asenoki asenoksasa ayongzuka amongba benjongtem zünger mezüngma, kenten benjong, saisapong benjong, aonsutsü benjong, süngjanglijang benjong aser ano tangbo süngküm (bamboo) benjong dena amonger. Atangji, benjong amongba nungji kecha tai mali aser tepelatsü dang keta lir. Ajisüaka, mapa –mapa dang inyaker, anisüngzük aser asayatsü nung kenyongi mapang magütsüra, iba jagi Jack-baji sowar akümer ta shin nung ashi ama, benjong-benjong dang amongba agia Jack-baji sensakpu akümtsü. Ano ajisa tamajungba. Tanü Naga nunger Jack-baji mapa-mapa dang inyakba nisunga masü saka küm piyong benjong-benjong dang monga jajaba Jack-baji asütsü. Aji oda, taoba küm ishika benjong-benjong dang monga arur, tangbo asenok shitakba sobaliba benjong Moatsü aser Tsüngremmong amongtsübo kecha maka, nashi ak tepseta amongtsüabajibo yutsür, shi seret kata alia benjong memongtetba kin aser kibongji asenok kümogo. Ashiko, asenok aika Christmas benjong amongtsüa asoshia kecha maka shisabolua alitsüa akok, kechiyong asenoki benjong mongner dang ashi asenoki benjong amongtsü asoshibo kecha meinyaker. Aji oda, asenok taoba küm ishika benjong monga-monga mapa inyaksü amadokogo. Ibayongji, asenok benjong paikaya mongaka tetezü maka akümer, kechiyong kecha makaser aputepa benjong amonger. Shitakba agibo, benjong yabo takar mapa, anungji benjong amongtsü asoshi akatsüla aser akatsü atema mapa inyaksüla. Ajisüaka, asen lima nung tangar dang tenla meshia bendanger dang ak , jangotsü aser metsü mersü ajak alia benjong amongba ya takar mapa masü saka alartem kibur dang nungi sen apua benjong amonger amai asenoki bilemdi. Benjong shia ya mapa dak sendaka lir, anungji kechi mapa sayua asenok benjong amongtsü ? Ibayongji, Nagaland nung aonsutsü aser süngjanglijang benjong amongyonga, benjong monga pelateptsüa asen lima nung aonsutsü aser süngjanglijang züsentetba mangur. Aji oda, Ngaland nung yongsen aser teka agi tapu balala yanglutetba benjong among nunga, ashiko, asenoki yanglutetba osettem dang nungibo Assam nungi alia bener aruba osettemang teimba sayua benjongteptsüa akok. Kasaji, Nagaland nung süngküm benjong amongyonga, süngküm agi yanglutetba osettem bener arua pelatepa amonger masü, teyanglutetbabo kecha maka ser süngküm benjong tenüng nung kentena aser chiyongtepa benjongtepba agibo Jack-baji sowar-ang akümtsü. Aji oda, mapa mapa inyakba agi jack-baji sowar makümtsü aser benjong-benjong amongba agia Jack-baji mesensaksü atema, asenokbo benjong ya temer külen, khen jungjunga süngjemshir benjong amongba tetezü aser benjong amongtsüba nükjidong indang bilemdangtsüla. Atangji, loktiliba nung aliba taküm ka asoshi benjong amongtsüba ya tongtibang, kechiyong benjong amongba mapangang Tsüngremi moatsüba aser asenoki inyaktetba mapatem indang tali jangjar. Aji oda, tsük aser jenjang menjang jen sünga bendena yur iba benjong amongtsübaji koda jangratemtsü, kasaji aonsutsü yoker meyokma aser chir mechima züsenteta yur aonsutsü benjong ampngtsübaji koda tajung, kasaji süngjanglijang onger meongma aser yoker meyokma kurepa tanga yur süngjanglijang benjong amongtsübaji koda tepelatsü aser iba amaji süngküm agi yangluba ki nung süngküm agi yangluba oset tapu balala yoka benjong amongtsübajia jangratemtsüka asütsü. Iba tangatetba nung asenoki Moatsü, Tsüngremmung aser Christmas amongtsü asoshia mapa meranga inyaksüla. Tanü asenoki apua benjong amongba aser kecha makaba agi benjong memongtetba ya asenok asoshi sobaliba nung tamakok dang masü maksü lir.

## OLEMSABANG

### Item senti sayu o ya ken züngdangang

L. Ngangshi Jamir, Mokokchung Village)

1. Shiri Laishiba azüngtsü mapang magütsüteter takoksa ulura.
2. Ne nük junga alidang Laishiba kanga nendaka züngang.
3. Kotaki atutsü apu ka dang, aji kangki.
4. Na ajak ka-aka Yisu makara kecha maka den saku.
5. Tanü Arogo tema yimya standardbo kanga atur, saka Tanela standardbo kanga alur.
6. Tanü Tsüngrem tenzüker rongnung Tanela khuret akaba tenzüker agi anünga lir.
7. Tsüngrem tenzüker kari atakatem bendener, kari temoatsü bendener. Naoa kechi bendener.
8. Na medeni Tsüngremi ajak inyaktet, saka Tsüngrem medeni nai kecha meinyaktet.
9. Na anema yimsüsür ain adokra na süngjemshiang.
10. Shibai pei taküm manishiteter, pa/laji lakem makaba Kor ka mesük.
11. Alima nung tesama tulutibaji Tanela samabaji lir.
12. Tangar lendong madak pelarji memerenshi-i malitsü.
13. Ne akümlüwa kanga tatsü ta kodanga tamadok.
14. Azüki telaer ka nung liaka Khrista kara Kotak nung alir ama tepela tesünep nung jangradema alitsü. Sentsüprang longru ki taren pungo trok atongtepa asüba ki nung liaka Khrista makara Mulomi nung alir ama ayatai tia nung alitsü.
15. Sarasadem nung mapang tali indokbaji takoksa kecha mali.
16. Sarasadem agi aonung ki shibangang, sarasadem agi anepdang kishi lapokang, sürabang ammanng piyong Kibubai anüktsü; anogo tepiyong Pai len anitsü.

### Ao oshi ojang kar medemdangba

P. Renthly Jamir.

*Yashi adok nungi...)*

48. **SÜKTEP/ZÜNGDANGTEP**:- Ana ya kasa kecha tepila mali kwi aka mesüra sentsüh kwi tsüa lir ta süktep züngdangtep.
49. **TEPTEP/ZÜKTEP**:- Ana ya kasa saka teptep süra süng lung amshia raratep asütsü akok, teka tesa agi raratep asütsü akok. Züktep ta süra süng amshia kati ka , den raratepba lir.
50. **TSÜNÜTEP/YIMTEP**:- Ana ya kasa kodang iba nung alu bendenlokdir süngolu yimtep coffee lu yimtep saka süngdong tenüng dang amshira kozüdong tsünütep süngdong tsünütep.
51. **TESHITEP/TETAKTEP**:- Ojang ana ya kasa kecha tepila mali, ku teshitep kumesü agi makoker. Süng tetaktep taso makoker.
52. **TAMATEP/SÜNGMANGTEP**:- Ojang ana ya kasa kecha tepila mali saka tamatep süra joko kechiang mashi taolen lenmang mali. Süngmangtep süra ya koda sür yanglutet inyaktet ta shisadanga bilemba-a alitsü sayatenya amala indang. Ya koda asütsü ta tamatep, ngur süngmangtep.
53. **WASHITEP/WALUTEW/WATITEP**:- Ojang asem ya mesükteper washitep süra telok O telok na ola agütsütepa ayimtepba. Walutep/watitep süra tenüngsang agütsütepa longsopepa pelatepba.

Yamala Ao oshi nung TEP agi atemba ojang aika lir. Anana ya bendanga ratettsü temela amai saka mapang agia-ang bendangteter karbo pulutepa rateta alitsüa akok.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



## NCCK-i ochimashir lenirtem nem vote magütsütsü ayongzük



NCCK Chair, Rev. Dr. Elias Otieno (tiyong), Secretary General Rev. Canon Chris Kinyanjui (abelen) aser Anglican Church of Kenya Archbishop, Jackson Ole Sapit nungeri osangbenertem den jembidang tangokba noksa nung angur.

**December 06, 2024:** National Council of Churches of Kenya (NCCK)-i Kenya nungertem dang pei senti vote agütsütsüla saka mapa junga meinyakba MP tem aser ochimashir MP tem nem vote magütsütsüla, ta ayongzük.

NCCK-i Kenya nungertem dang 'aramesoang aser nenok tarutsü tia yangluang' ta ayongzük ta tayongzükba onük 8 lemsatep.

December 03, 2024 nü NCCK Chair Rev. Dr. Elias Otieno aser Secretary General Rev. Canon Chris Kinyanjui natisa linük nung nūburtem aser meimchir temeden atema inyakertem puer aoba kanga bulua atalokba atema tebilemtsü akaba lemsatep.

Rev. Otieno-i, Kenya nung temzüng aser legal inyakim amokmeren tia nung lir aser joko shingaia mamangtetsüsa yazü jembiba kanga bulua kümogo, ta ashi.

NCCK-i, iba sangdong ya Kenya nungertem den lemsatepba 'Pastoral Letter' lir, ta ashi.

NCCK-isa sensotem dang, MP temi nūburtem atema inyaksü melen sorkar executive branch indang hadirtem ama kümogo, ta metetdaksü.

Constitution of Kenya 2010 metetdakja NCCK-i nūburtem dang nūburi imlaba ama meinyakba MP tem agientsüsa vote agüjang, ta ayongzük.

NCCK-isa Independent

Electoral and Boundaries Commission (IEBC) tanaben tasen tentetshitsü atema takhangba agütsü.

Rev. Otieno-i, IEBC tasen tentetshitsü memelungba ya Kenya nung mezügmeshiba lir, ta metetdaksü.

Sensotemi rongshiba ajanga sorkari ozüng karbo magizük; item ozüng rongnung Finance Bill 2024 densema lir. Saru atutsü atema iba Bill benokba sülen taküm June-July nung nūburtemi sashia longkak aita liasü.

NCCK-isa taküm October 1 nungi benoka inyakba Social Health Insurance Fund-a tangsa anentsüla, ta takhangba agütsü.

Rev. Otieno-i, linük nung nūburtem timtemtsü ta metetsümonga Parliament nung kanga kera ozüngtem agizükba atema Kenya nungertemi legislatures dang tasüngdangba akatsüla, ta ashi.

National Council of Churches of Kenya (NCCK) nung ya Khristan Arogo aser organization 50 dak tali densema lir. Item Arogo aser organizations rongnung Anglican Church of Kenya, Methodist Church of Kenya, Coptic Orthodox Church aser Salvation Army densema lir.

Linük nung Generation Z lanurtemi longkak aitba sülen nungi tenzük sorkari meshidaki yimsüsüba atema Arogoi sadoksadoka ola adoker.

Taküm June ita nung longkak aitba mapang nung Kenya nung lanurtemi Arogo dang yimtenren lenirtem den pilatsü aser Arogoi nūburtem atema ola adoktsü tayongzükba agüja liasü.

2022 küm August ita nung Khristantem teyari ajanga William Ruto-i takok ngua Tir aküm, ajisüaka küm ana süia arudang Arogoi joko pa pu-masemer.

November ita tomken Kenya Conference of Catholic Bishops (KCCB) nungi Nairobi Archbishop Philip Anyolo-i, Nairobi Angh Johnson Sakaja aser Tir Ruto nati dollar sen 45,000 Arogo nem tenla agütsübaji Arogoi meyipa agütsütsü, ta metetdakja liasü.

Archbishop Anyolo-i, iba ya Arogo inyakim nung lir aser Public Fundraising Appeals Bill den sendaktepa lir, ta metetdakja liasü.

"Amongnü, November 17 nü Soweto Catholic Arogo nem tenla agütsübaji item telatetba aser ozüng alema lir. Tenla agütsüba senji tenla agütsürtem nem tanaben meyipa agütsütsü," ta KCCB sangdong ka ajanga metetdaksü.

Ano külen Evangelical Alliance of Kenya-ia sorkar dang linük nung healthcare, shisaliok, ochimashi aser election dak sendakba onüktem nung o lemteptsü atema national convention ka ayongang, ta mepishiogo.

## ANO GO ABEN TSÜNGREM DEN

### Tekülem ; Baptiba Ka

Nenok temenen atoktsü asoshi nenok temulung meyipang aser nenok nisung shia Kibuba Yisu tenüng nung baptiang. T. Mapa 2:38

Martin Lutheri ashi, "Khristan kati baptiba kuliji yipten jara nung idaka yuang aser iba jagi anepdang shia saker aji angudang pa/la baptiba bilemtetdaksütsü.

Baptiba nung Tsüngremi asenok Par chirtem ama agizüker. Tanur kati obendang dak mesütetba tamaittsü inyakim mangatetter. Tsüngremer kidang kinü tanur asoshi baptitsübajia lir. Lai/pai amatoktsü akok, saka iba jagi baptiba mapang tongtipangji ajema kümdaktsür ta masü.

Baptibaji Tsüngremi asenok par chirtem ama mesütetyim lir. Kodang asenok baptir, Khrista asenok adianu akümer. Asenok Par kibong nung züngsem ka akümer.

Asenok baptibayim jagi aser Tebu teka asenok tsütsü songtoka lir ta ashir. Iba tetezü tekümtetji iba kisüng nungi angutsü ta masü kechiaser pa nungi meyipa aotsü akok saka pai asenok nungi kodang meyipa moatsü. Asenok nungi jena aotsü aser Pa meyong mesüi akümtsü akok saka Pai kodanga asenok nungi jena maouer aser asenok mesentoker.

Pa temeim aser tatok teti asenok tsütsü lir. Kibuba, ni baptiba taochi nung alitsü yariang; Yisu tenüng nung. Amen.

## Algeria nung Khristan ka küm 3 sülen tepuokdak nungi chiokogo



Suleiman Bouhafs

**December 06, 2024:** Algeria nung Muslim yimsü toktsür Khristan yimsü agizüker, Suleiman Bouhafs küm asem shi jail nung puokba sülen tawa jail nungi chiokogo, ta International Christian Concern (ICC)-i metetdaksü.

Suleiman-i Islam yimsü mezügmeshi aser kiralongra mapa nung pa densema lir, ta pa nem tai tongloktsüba sülen pa küm asem jail nung puok.

Ajisüaka Suleiman Bouhafs-ibo pai kiralongra nung shilem agia mali, ta ashir.

Bouhafs anema aibelen aika tongloktsüba sülen 2021 küm September ita nung judge kati pa küm 3 tepuokdak ayutsü obendang agüja liasü.

Suleiman-i ainkar Muhammad mezügmeshi aser kiralongra dak sendakba aibelen inyak, ta pa nem tai tonglokja liasü, ta United States Commission on International Religious Freedom (USCIRF)-i metetdaksü.

Suleiman Bouhafs ya religious freedom watchdog group- St. Augustine Coordination of Christians in

Algeria nung Chairman inyaka liasü.

Pai Muslim nung ainkar Muhammad mezügmeshi aser Islam yimsü atala, ta pa nem tai tongloktsüba sülen pa reshikangshia liasü.

Pa anema ken o angadangba sülen 2016 küm September ita nungi 2018 küm tashi pa jail nung puok, ajisüaka linük Tiri pa dang taochi sayua chioka liasü.

Iba sülen pa Tunisia-i jena ao aser iba linük nungji 'refugee status' angu.

Pa Tunisia linük nung jenoka liaka 2021 küm August 25 nü Algeria nung kari kangshia pa kidang nungi anizük aser Algeria-i anir arua liasü.

Bouhafs-i, pa apui arurtemi pa kolak nung yangkhu ka semoktsü aser pa reshikangshiba sülen Algeria-i meyipa anir aru, ta metetdakja liasü.

Taküm October ita nung USCIRF-i, "Algeria nung Khristian Evangelical Arogo ajak amai shibangtsüogo aser taküm May ita tashi nungbo Arogo ka dang anünga liasü," ta metetdaksü.

## Nasarawa state nung Khristan ana tepset aser pastor ka puer ao

**December 06, 2024:** December 1, 2024 nü central Nigeria nung Fulani Muslim teloki yimtsüng aika amakdang Khristan ana tepset aser pastor ka densema Khristan aika puer ao.

Nasarawa state kübok Gwanaje yimdak Barnabas Para par kima kiyongertem den külemi lia Fulani teloki amak, ta yimdaklir Moses Bello-i metetdaksü.

"Aonung 8:00 ako meta ni kidang anisüngzük alidang ni injang ola angashi. Kiyonger ka ozü kidangi jena aru. Pai kü dang, Fulani telok züngsemtem ozü kiyonger Barnabas Para'er

kima lir ta ashi. Iba sülen onok iba tesem jagi ao nung Barnabas sür lia angu," ta pai ashi.

Fulani telok jagi Okigwe Gajere puer ao saka pai jena oteta kidangi meyipa aruogo, ta Bello-i metetdaksü.

Kasa teloki Ntsakpe yimdak Khristan ka tepset aser ka yiruja liasü.

Akwanga Local Government Council nung media adviser, Nathaniel Maaji Lauji-i, "Gwanje, Ntsakpe, Ningo aser Goho yimtsüngtem amakba osang onok nem metetdaksüogo. December 1 aonung 8:00 ako nungi 9:00 ako tsüngda item yimtsüngtem

amak," ta metetdaksü.

November 28 nüa Fulani teloki Khristan yimtsüng Ningo amak aser Living Faith Church nung pastor, Charles Joshua den Khristan asem puer ao, ta Bello-i metetdaksü.

Alima nung Khristantem teimba tepsetba linükji Nigeria lir. October 1, 2022 nungi September 30, 2023 anogo tashi nung Nigeria nung Khristan 4,118 tepsetogo. Kasa mapang nungjisa Khristan 3,300 puer ao.

Alima nung Khristantem alitsü linük tamajungtiba 50 rongnung Nigeria ya jenjang 6buba nung lir (Open Doors World Watch List 2024).



**AO OSHI ANGAZÜKDAK:  
TANÜ ANGAZÜKTSÜBA OJANG**



**Tatakrutsü**

(n) tansütsü shin o ( Exemplary quotes)  
\* Aor tatakrutsü agi asenok kümdangshidaksür.

**Tatazkük**

(adv) kwiar metetba ( measurement)  
\* Tesayuri tanurtem nem lesson zülutsü atema mapang tatazkük ka agütsü.

**OLONG PAITEP # 7004**

1		2				3	4		5
					6				
		7							
								8	
	9								
10									11
			12		13				
			14						
15						16			

**TIPIEN :**

- 1. Ali nung tsük - (5)
- 3. Yong-i atakba talemstü - (5)
- 7. Aoksa reprang - (6)
- 8. A \_\_\_ gur - (3)
- 9. Yongya ajurunüa bilemer - (9)
- 10. Atentsü asoshi mejemba - (3)
- 14. Lendong nungi jenbu - (6)
- 15. Junga lir - (5)
- 16. Lokti menjendi - (5)

**LANGTSÜNGLEN :**

- 1. Peria - (5)
- 2. Tai inyak - (7)
- 4. Teptsü - (4)
- 5. Mapa inyakdaksür - (6)
- 6. Ko \_\_\_ ang - (3)
- 8. Taruba küm - (7)
- 9. Tamendak - (6)
- 11. Tesangwa atema amshiba - (5)
- 12. Kümtet - (4)
- 13. Mesük - (3)

**OLONG PAITEP # 7003 TELANGZÜBA**

**TIPIEN :**

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem, 15. Tambu,
- 16. Khuret, 17. Sang.

**LANGTSÜNGLEN :**

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok, 12. Amang,
- 14. Jala.

**NAI-A YA METETTER MA**



Germany nungi Serial Guinness World Records breaker Andre Ortolf-i ano otsü tasen ana yangluogo.

Andre-i mapang tekaratiba nung lemon juice litre ka straw ajanga ajem. Pai iba otsü ya 13.30 seconds nung dang yanglutet. Iba sülen paisa lime juice litre ka straw agi 13.51 seconds nung jemtetba otsü yanglua liasü.

**Manipur nung nisung samaba indang kulikaket ajak PMO dangi yokogo**

Imphal, December 6, 2024 (Agencies): Manipur nung Leimakhong Military Station nungi samaba Laishram Kamalbabu Singh dak sendakba kulikaket ajak Centre dangi yokogo ta Social Welfare Minister Heikham Dingo-i ashi. Prime Minister's Office (PMOs), Defence Minister Rajnath Singh aser Home Minister Amit Shah nung dangi yokogo ta pai ashi.

Laishram ya Assam kübok Cachar district nungi lir aser pa

Imphal West kübok Khukrul nung telidak liasü. Pa ya Leimakhong Military Station nung Military Engineering Services nung contractor ka atema supervisor inyaker. Pa ya November 25 nungi samar bushiteper.

"Onoki PMO, aser defence minister o home minister office tem dangi yokogo aser telangzüba ka atar. Pa ya lendong nungi jenbua aliba tesem ka nungi sama anungji Army-i iba tebilemtsü khuret

abentsüla. Iba tatalokba atema kanga sasaa bilemer" ta Minister Dingo-i ashi.

Leimakhong Military Station nungi kilometer 3 shi pilar Kanto Sabal nung nisungtemi lungkak aitba manener. Parnoki state sorkar dang Mete-i nung Laishram kümzüksü atema ayongzüker.

Hombarnü Army-i Laishram Singh bushitsü atema sepa 2,000 tema mapa lemkütsüogo aser parnokisa drones aser tracker dogs amshir.

**Assam, Arunachal, Manipur nung NVs tasen lapoktsü**

Guwahati, December 6, 2024 (Agencies): Prime Minister Narendra Modi menden ser Cabinet Committee on Economic Affairs-i Navodaya Vidyalyas (NVs) tasen 28 lapoktsü mulunga agizükogo.

Taoba nung iba scheme agi mayimjemba district tem nung NVs lapoktsü. Northeast dena linük nung yimtsüng balala nung sempet aketba kaketshirtem nem quality modern education agütsütsü nükjidong nung iba mapa inyaker.

Centre-i Assam, Arunachal Pradesh, aser Manipur dena state aika nung Navodaya Vidyalyas tasentem lapoktsü metetdaksü.

Arunachal Pradesh: Upper Subansiri, Kra Daadi, Lepa Rada, Lower Siang, Lohit, Pakke-Kessang, Shi-Yomi, & Siang.

Assam: Sonitpur, Charaideo, Hojai, Majuli, West Karbi Anglong, South Salmara-Mankachar.

Manipur: Thoubal, Kangpokpi, & Noney.

Iba mapatong ya küm pungu (2024-202) tsüngda Rs 2,359.82 crore endoka inyaksü. Iba nung capital expenditure Rs 1,944.19 crore aser operational expenditure Rs 415.63 crore dena lir.

NV shia residential co-educational school asütsü aser kaketshir 560 azüngtsü akok. Iba ajanga shisaliok reju 28 nung kaketshir 15,680 ajangzüksü.

Iba mapatong ajanga permanent jobs 1,316 adoktsü kechiyong NV shia nung nisung 47 nungdaker.

**Guwahati nung Rs 1.5 crore alang heroin apu**

Guwahati, December 6, 2024 (Agencies): North Guwahati kübok Amingaon area nung Special Task Force (STF)-i Rs 1.5 crore alang heroin apu.

Osang tejangja ka angazükba sülen STF teloki

Amingaon nung highway anasa gari (AS24B2485) ka soter mita reprang.

Idangji police-i gari nung sapon pongdang 13 nung heroin grams 182 bena aliba angu. Iba indang jenjang ya international market nung Rs 1.5 crore shi

alang lir ta asadangtetogo.

Heroin ji Silchar nungi Barpeta-i bener aodang len tom nung apu. Gari nung Silchar nungi Masum Chowdhury (23) aser Barpeta nungi Kazi Sanwar Hussain (24) na mena aliba apu.

**Manipur State Women for Commission-i Jiribam semdang**

Imphal, December 6, 2024 (Agencies): Manipur nung tetsür asem aser tanur asem tepsetba atema Manipur State Commission for Women (MSCW) teshimtet telok kati November 28, 2024 nü Jiribam semdangogo.

MSCW Chairperson-i anir züngsem ana adenba fact-finding team-i bushisüngdang süogo.

November 29 nü MSCW teloki Jiribam Deputy

Commissioner-i ayongba senden ka nung aden. Iba senden nung Police, Social Welfare, aser Medical Department tem dena tongti department tem nungi nisungtem aden aser relief camps nung ajuruba tayongzükbatem lemsatet.

Department temi tayongzükbata balala ajuruba aser tarutsü nung relief camp ketdangsüa aotsü tebilembatem lemsatet.

MSCW telokisa relief camps ketdangsüa reprangba Special Superintendent of Police aser Nodal Officers den senden amen.

Parnokisa Jiribam district nungsa One Stop Center semdang aser staff den ajurutepa sensaksem.

MSCW züngsemtemisa takoksa ajuruba kibongtem den ajurutep aser parnok khuret aser tebilembatem lemsatetpa angaogo.



Mayflower Hotel, Guwahati nung WWF-India's Educators' Conclave alidang agiba noksa ka angur. Iba sentong nung Assam aser Meghalaya kübok school 38 nungi educators 76 aden aser parnok school tem sustainability hubs kümdaksütsü atema kaketshirtem dang environmental stewardship aser climate literacy sayutsü atema tebilembatem lemsatet. Iba conclave ya "Raising Generation 30" omen nung ajemdaker agi.



NAGA NUNGER NÜPURTEM DANGI DR. S. C. JAMIR TETSÜ TAKATULA-ER TAYIMDONG NUNGI OLA KAAYIMOKTSÜR

Küm 20 dak tera tali ogo Dr. S. C. Jamir ya Saab nunger SDO ka chir ta osang nung adokja-a liasü. Anungji iba osangji tejangja nung Dr. S. C. Jamir tetsü-er kidong yimsüsüri meyipa osang nungji adoktsüogo. Ano meimlaika tawa tanü Dr. S. C. Jamir ji azü tendangtsüla ta shir kin-i mesüra shir chiri osang prokshiogo, ya asoshi kanga aksar. Anungji Ao Sendeni anir lokti tentet balalai osang proksangji bushitsü aser apotsü asoshi osang agutsüogo, iba nungji Takatula-er tayimdongtemi-a tai madoktsü ta osang sangdonger kechiyong kuliji tejangja nungdaker aser la tang masü Aotsürtemia Aotsür masungtetü liasü ta osang nung adokba anema nokdakbaji onokia nongiter.

Tetsü tebou nungi atalokyonga aruba onoki meteta lir. Takatula tebo ya Dobashi aser yimsüsür Likokyangba-er jala liasü. La ayuwa mapang nungi tasungtet ayir ka aser yimsüsür ka jala asü nung Dobashi aser yimtak Samenti Senayangba-i pa kinungtsü asütsü agiadok. Metettsü asoshi tongmelang agi yamai- Senayangbaji(Dr. S. C. Jamir tebo) Noklenchizung-er chir aser Noklenchizungji Jongshinokdang-er chir, Ungma yimlang nung Samenti süa yimsüsürtem liasü. Jongshinokdangji kenü azunglen Chuchuyimlang nung Dr. Clark 1890 madongtang tenaji jembitepa, "Na Aoli Tsüngremji ana?" ta Dr. Clark-i Jongshiba dang aser Jongshiba-i,"Na-ang alima Tsüngrem" alulangtep. Ongpanglen Khristan yimsüji atunüaka nok-arr mapang asü nung matutetti aliba tensa nung Jongshinokdang-i Clark-i bona aliba yimsüji magizükaka kechi yim sa ajanga atutsü ali, item yim tem ajak dangji Clark Ungma-i atuba mapang lendong kecha majurui atutsü asoshi osang agutsür alitsü tena zungzüktep. Aser iba sülenji Clark kecha timtem mekai Ungma atongdang Jongshinokdang anempong nung liaka Clark saabji agizüka Ungma lima nungji Khristan yimsüji tejangrar bo agizüka amangtsü saya-a yutsü yong yimsü agizüktsü jangra-a alirtem agizüka aoba otsü nung lir. Ano aji dang masü Jongshinokdang jagi yim-o-yim na tsünga tekolak bushiba anener yimjong nung lia aotsü inyaktetba aikasa lir.

Aji oda onokibo Dr. S. C. Jamir ta masü saka par semchirtem temoatsütemji Jongshinokdang temoatsü ta sa jembir. Senayangba aser Takatula nachirtemji tambo nungi tanuposang tashi tekolak-a aser sorobangro-a tetsüra-a tebor-a ajak kasa dang lir.

Shir chiri aser kin-isa pa bomb agi aser injang agi poksettsütsü aser kasettsütsü merangogo tamakok anguyong kela tamaket nung ojang arishiang. Alimapur süra aji kelen saka tamanger chanu mesüra kin süra Tsüngrem sendong ar angatetang. Naga nunger ashioktsütsü aser anema inyaktütsü pai (Dr. S. C. Jamir) inyakba onoki bo mangashi aser mangu aser pai onok anükapang danga Naga nunger anemtsü tashia mashia Arung! Lira, otia arua shiang. Naga nunger nüjiso asoshi timtem, tuokrong aser tasüba ozü kidongi-a aikasa ajurua aser aremzüka aruogo.

Kidong rangben tenung nung:

- 1) L. IMLIKOKBAIMSONG, TATAR.
2) ALEMTUSHIIMSONG, TATAR.
3) CHUDENERIMSONG, TATAR.
4) TAJENSANGBAIMSONG, TATAR.
5) TSÜKNUNGSUSANG IMSONG, TATAR.
6) ALINGANGSHIIMSONG, TATAR.
7) NÜKMETSÜBAIMSONG, TATAR.
8) IMKONGMERE IMSONG, TATAR.
9) IMTISUSANG IMSONG, TATAR.
10) SAKULEPDEN IMSONG, TATAR.
11) SAKUNUNGSANG IMSONG, TATAR.
12) SENMOABAIMSONG, TATAR.
13) IMTIYANGER IMSONG, TATAR.

Ukraine nung tamakok majurutsü atema mera ajak agitsü: Lavrov

Moscow, Luchii/December 06 (Agencies): Tawa Ukraine rara nung hypersonic missile amshiba ya tamakok majurutsü asoshi mera ajak agitsü Moscow renema lir ta West nem angatetdaksütsü asoshi liasü, ta Russian Foreign Minister Sergey Lavrov-i ashi.

Lavrov-i iba o ya United States osangbener Tucker Carlson den Brehostibarnü sensaksemba mapang jembia liasü aser West ya alima, linük mashi, region mashi, continent mashi madak temaba ta sayutsü

asoshi rarar ta pai ashi. "Onoki ozü security temeden tejangja asoshi rarar. Onoki signal tem yoker aser hopta ishika jakdang tatemsa Oreshink ta ajanga weapon system tasenba signal süoki ia agizüka alitsü imlar," ta Lavrov-i English oshi nung ashi.

Russia-i Washington aser par partners den tensa tamajungba mekumdaksüner aser mangatetep madoktsü meranger, saka parnoki nungdakba mangatetra ano osang tali yoktsü, ta Lavrov-i

tekumdangtsü ashi. Russia-i taoba ita Ukraine nunger Dnipro yimti nung Oreshnik hypersonic missile khaloktsü, koba khazüka yoktsü makokba missile ka tendangba lir ta Russian Tir Vladimir Putin-i shia liasü.

Ukraine-i par litsü-lika lungjemer ketdangtsütsü maongka anaben tashi parnoki magizük, ka rara metenzükdang aser ka 2022 küm April ita Turkey nung jembishinüba mapang, ta Lavrov-i ashi. (Maneni tapak 8 nung...)

South Korea tiri par party lenir aputsü tuyu



Han Dong-hoon

Seoul, Luchii/December 06 (Agencies): South Korea Tir Yoon Suk Yeol-i Mongulbar aonung martial law sangdong dang par ruling party lenir Han Dong-hoon aputsü tetuyuba agütsü.

Aputsü asoshi tenüngtem agütsüba nungya opposition tongti Democratic Party lenir Lee Jae-myung den opposition

telok nungi ozüng yanglur asem aser National Intelligence Service deputy director dena liasü.

Tiri iba maongka amshia parnok puer samatsütsü merang, ta director Hong Jang-won-i ashi.

Hokulbarnü linük indang political party tem ajungben rondak senden amenba

mapang iba osang ya temi adok, aser MP temi Yoon anentsütsü asoshi vote agiteptsü sentong lir. Iba onük ya Honibarnü benoktsü lir, aser MPs shilem asem lemsar shilem anati yangji vote agütsüra agizüktsü.

Menden 300 aliba parliament nung opposition pur timba, saka impeachment motion agizüktsü asoshi vote 200 nungdakba ngutettsü atema ruling party nungi MP ti indang vote nungdaker.

Par party-ia opposition den külemi vote agütsütsü ta temaitsü tejangja sayua Yoon'er ruling party leniria pa anentsütsü Hokulbarnü ashi aser pa yimsüsüba menden nung lira democracy asoshi lendong tulu alitsü ta shia liasü.

(Maneni tapak 8 nung...)

ALI AYOKER

FOOTHILL LEMANGANASA VIHOKHU NUNG ALI LEPSA-AAYOKER. TALITSÜ KIMONG ATEMA TAJUNG ANUNGJI TALINUR TEMI IBA NUMBER NUNG CONTACT SÜANG. SQFT. NUNG 80/- DIRECT CONTACT : 6009530632 / 6009094225

ONGC TRIPURA POWER COMPANY LTD.

Regd Office: ONGC TRIPURA POWER COMPANY LIMITED, Udaipur-Kakraban Road, Palatana P.O., District Gomati, Udaipur, South Tripura-799105 India Delhi office: 10th Floor, Core-4&Central, Scope Minar, Laxmi Nagar, New Delhi - 110092

NOTIFICATION

[In Pursuance of Clause (6) of Regulation 3 of CERC (Procedure for making application for determination of tariff, publication of application and other related matters) Regulations, 2004]

- 1. The applicant above named has made an application before the Central Electricity Regulatory Commission, New Delhi for determination of Multi Year Tariff for FY 2024-29 of OTC 726.6 (2x363.3) MW Palatana Combined Cycle Gas Turbine (CCGT) Power Project based at Palatana, Udaipur (Tripura).
2. The beneficiaries of the generating station are: A) Assam State Electricity Board, Govt. of Assam B) Department of Power, Govt. of Arunachal Pradesh C) Department of Power, Govt. of Nagaland D) Manipur State Power Distribution Company Ltd, Govt. of Manipur E) Power and Electricity Department, Govt. of Mizoram F) Meghalaya Energy Corporation Ltd, Govt. of Meghalaya G) Tripura State Electricity Corporation Limited, Govt. of Tripura
3. The capacity of the generating station based at Palatana, Udaipur (Tripura) is 726.6 (2 x 363.3)MW.
4. Estimated Capital Cost of the project (in Rs Lakh): Original: Rs 342930 Lakhs Final (Revised) : Rs 404700 Lakhs
5. Authority which has approved the capital cost of the project: The Board of Directors of the Company
6. The Scheduled date of Commercial Operation: Original: Unit-1 22nd December, 2011 Unit-2 22nd March, 2012 Final (Revised): Unit-1 4th January, 2014 Unit-2 24th March 2015
7. Actual date of commercial operation: 24th March 2015
8. Capital Cost on the date of commercial operation: Rs 307135 Lakhs.
9. Details of Tariff : Rs. (Lakhs)

Table with 4 columns: Tariff For Previous Year, Year Wise Tariff Sought to be Determined (2023-24, 2024-25, 2025-26, 2026-27, 2027-28, 2028-29). Rows include Capacity Charges (Rs Lakhs) and Energy Charges (Rs/Unit).

- 10. A copy of the application made for the determination of tariff is posted on the website www.otpcindia.in
11. The suggestions and objections, if any, on the proposals for determination of tariff contained in the application be filed by any person, including the beneficiary before the Secretary, Central Electricity Regulatory Commission, 6th, 7th & 8th Floors, Tower B, World Trade Centre, Nauroji Nagar, New Delhi-110029 (or other address where the office of the Commission is situated), with a copy to the applicant within 30 days of publication of this notice.

Place: New Delhi Sanil C. Nambudiripad (Managing Director) Date: 07th December, 2024



NHPC Office Complex, Sector-33, Faridabad - 121003 (CIN: L40101HR1975GOI032564) SCHEDULE

[To be published in pursuance of Clause (7) of Regulation 23 of Central Electricity Regulatory Commission (Conduct of Business) Regulations, 2003]

- 1. Temalen tenüng agüja aliba petitioner ajanga Loktak Power Station atema tariff latettsü asoshi Central Electricity Regulatory Commission, New Delhi nem petition ka agüja lir.
2. Iba generating station nungi tajangzük agirtem :

Table with 2 columns: Item, Details. Rows include Assam Power Distribution Company Ltd., Meghalaya Energy Corporation Ltd., Department of Power - Manipur, Department of Power - Arunachal Pradesh, Department of Power - Mizoram, Tripura State Electricity Corp. Ltd - Tripura.

- 3. Capacity of the generating station : 105 MW
4. Approved capital cost of the project : ₹18,373.47 lakh as on 31.03.2019 allowed by CERC vide order dtd 30.04.2022 in petition No. 296/GT/2020
Authority which has approved the capital cost : CERC
5. Scheduled date of commercial operation : Already in Commercial Operation operation
6. Actual date of commercial operation : 01.06.1983
7. Capital cost on the date of commercial operation : ₹115.77 Crores
8. Details of tariff: (₹ in Lakh)

Table with 5 columns: Sl. No., Hydro Power Generating Station, Tariff for the previous year (2018-19), Year-wise tariff sought to be determined (2019-20, 2020-21, 2021-22, 2022-23, 2023-24). Rows include Annual Fixed Charges and Primary Energy Charges.

Table with 5 columns: Sl. No., Hydro Power Generating Station, Tariff for the previous year (2023-24), Year-wise tariff sought to be determined (2024-25, 2025-26, 2026-27, 2027-28, 2028-29). Rows include Annual Fixed Charges and Primary Energy Charges.

- 9. Tariff latettsü atema petition copy ka website: https://www.nhpcindia.com nung 'Commercial' kübok inokja lir.
10. Jenjang latettsü asoshi petition agüja aliba nung temelenshitsu aser tai aputsü kar danga lira, tajangzük agir densema nisung mashi kati Commission indang e-filing portal ajanga Petitioner dangi copy ka dener iba sangdong adoker anogo 30 tsünga agütsütettsü.

Place : Faridabad (Ajay Shrivastava) Date : 29.11.2024 General Manager (Comml.), Commercial Division

Office of the MONGCHEN SENSO MUNG DANG P.O MANGKOLEMBA B.P.O MONGCHEN-798604 e-mail: mongchensensomungdang@gmail.com

TENÜNGSANG AGÜTSÜR

2024 küm item senso aser sensotsur takoker nem Mongchen Senso Mungdang ajanga konang tetushi aser tenüngsang agutsür,

- 1. Er. Martemsu T. Imchen S/o. K. Takeeth Imchen & Watilemla, SDO (Civil Eng.) under Dept of PHE, Govt. of Nagaland
2. Mr. Imlichuba Imchen, S/o. R. Wati Imchen & S. Amen Jamir, Fishery Inspector, Dept. of Fisheries and Aquatic Resources, Govt of Nagaland
3. Mr. Bendangnungsang, S/o. Katiwaba & Merentola, Sectional Overseer (SO) Dept. of Water Resources, Govt. of Nagaland
4. Ms. Chubamerenla Imchen D/o. Lt. Temsunungsang & R. Amongla, Head Constable, Dept. of Excise & Prohibition, Govt. of Nagaland
5. Mr Watitemjen Imchen, Sub Inspector, Police (Wireless) S/o. Lt. Limachiba & Lt. Pangzangkala, recipient of District Commendation Certificate during the 78th India's Independence Day 2024



Tsüngremer leniba nenok wadang nung liangma ta asen sensosanger sarasadem.

Sd/- TAJENKABA Tir Mongchen Senso Mungdang Sd/- Dr P. TIATEMSU Tongti Zülür



# Kohima nung eSport championship tenzükogo



**Kohima, Luchii/December 06 (TYO):** 25 buba Hornbill Festival nung shilem ka ama Department of Youth Resources and Sports, Nagaland ajana ayongzükba eSports championship anogo ana atema Hukulbarnü Hall B, Indira Gandhi Stadium, Kohima nung tenzükogo.

Iba eSports telemsa asem – Battleground Mobile India (BGMI) DOTA aser FC 24 nung northeastern states nungi tetokteper temi region balala nungi parnok partners den külemi toktepar.

Iba sentong ya YRS Secretary Anthony Ngullie ajanga tenzükja liasü.

Sentong nung jembidang, tesüiba mapangbo saisapong ajunga tashi amshia asaya liasü saka tangbo technology mechi ajak melenshiogo, ta Ngullie-i ashi.

Tangbo nüburttem temeyong amshia internet nung FIFA aser danga games asayar, ta ashi.

“Mapang melenshiogo aser

yimya ajak lenmang balaka leni aor aser asenok ama taintemia asen tangatetba melenshitsü nüngdaker,” ta pai ashi.

“eSports ya gamesa asayaba indang lir... Tashi amshia masü saka yimya balaka nung asayar, aser lanurtemi eSports nung toktepa ngua pelar,” ta ashi.

Iba sentong nung mendenpuba ama YRS Director Kethosituo Sekhose-i jembidang, saisapong yabo timba temang tashi amshia asayar, saka state sorkari eSports ya tenzük, kechiaser computer aser technology adokba sülen nüburttem takum aliba yimya nung temelenshi tulu asenoki nguogo, ta pai ashi.

“Asenoki iba technology tasenba agizüksü nüngdaker, kong saisapong ya temang tashi amshiba kisüng masü saka tekolok shisatsü amshiba ka kumogo. Football nung kanga ajungba European linüktem nungbo PlayStation 5 mesüra FIFA 5 asayadaksür, kechiaser yangi parnoki team ajungtsü

asoshi tasa-lentong angatetba nung yarir,” ta pai ashi.

Iba yongji state sorkaria Nagaland nung eSports benoktsü telemtetba agi aser eSports tournament ayonger rongnung Nagaland ya mezünpur alitsü, ta ashi.

“Asenokia medal angutsü, talisa asen northeastern states nungi eSports nung aser eSports Olympics nung takok angur alitsü imlar, koba 2025 küm Saudi Arabia nung tenzüksü lir aser iba atema asenoka renemshitsü nüngdaker,” ta YRS Director-i ashi.

Tangbo state nung BGMI, Dota 2 aser e-football dang ayonger saka tarutsü nung ano eSports tournaments balala ayongzüksü nükjidong lir, ta ashi.

Peniel Christian Revival Church indang assistant pastor Vikhoto Zao-i iba asayamung tenzük sarasademja liasü aser iba eSports tournament final aser sempet agütsüba ya Honibar nikongdang alitsü.

# Kohima nung 3 buba State Level Catapult Competition agiogo

**Dimapur, Luchii/December 06 (TYO):** Department of Tribal Affairs ajanga Janjatiya Gaurav Varsh aser IEC campaign nung ayongzükba 3 buba State Level Catapult Competition nung lisopur yimya-yimbong benjonga liasü. Ibai tang temungdang Hornbill Festival nung shilem ka ama NSF Solidarity Park, Kohima nung December 6, 2024 nü ayongzükba liasü.

Ministry of Tribal Affairs ajanga sponsor asüba iba

tetoktepa nung Sumi, Angami, Chakhesang, Chang, Tikhir, Garo, Zeliang, Yimkhiung, Konyak, Sangtam, Pochury, Phom, Kuki, Lotha, aser Rengma kin nungi nisung 30-i toktepa liasü.

Iba tetoktepa nung Shangtok Phom-i mezüng jenjang tongtet, Meso aser Yhunsinlo Lorin nati tanabuba aser tasembuba jenjang nguteta takok angur nem Secretary, Tribal Affairs Department, Angelina Tajen-i sempet amokja liasü.

## BENDANGLI OSANG : Tapak 7 nungi...

### Ukraine nung tamakok majurutsü...

“Iba rara ya onoki metenzük. Ozü arütsü anasaleni NATO arudaktsüba ajanga timtem adoktsü ta onoki küm aika tekumdangtsü shia arur,” ta pai ashi.

Right-wing journalist aser US tir inyaktsü shimteta alisang Donald Trump tembar Carlson den minute 80 sensaksemba mapang, Russia dak “red lines” mali ta West-i bilemba yutsütsüla, ta Lavrov-i ashi.

Russia-i 2022 küm tetenzüklen nungi Ukraine makyonga aruba mapang Putin den America nunger osangbenertem rongnung Carlson yagi mezüngbuba sensaksem küm tetenzüklen kaa liasü.

“Anüolen alir kari Russia bo ‘red lines’ mali ta jembiba sülen parnok anidakra, ibaji aibelen

tulu asütsü,” ta pai ashi.

Tensa mashi atema Moscow renema lir, saka Russia indang security interests tejangja akumtsübobana nung ajemdaker jembishinüa yimjung asoshi onoki mulunga lir,” ta Lavrov-i ashi.

Oreshnik hypersonic missile amshiba ya Russia nunger tamachi inyakyim tesüsaba lir ta Ukraine Tir Volodymyr Zelenskyy-i ashi aser timtem tasen koktettsü asoshi air defence systems tasen meshia liasü.

Brehostibarnü Malta nung annual security meeting ka alidanga Ukraine tensa tamajungba akumtsüsa West-i inyaker ta Lavrov-i ashi saka Blinken aser dangar temi melangzüdang pa senden nungi ayazükba ao.

### South Korea tiri par party...

People Power Party (PPP) tekolakba Han Dong-hoon-ibo hopta tetenzüklen opposition indang impeachment motion bhukuma par party-ibo vote agütsütsü ta shia liasü.

Saka Hukulbarnübo paia pa densema tongti yimten yimsüsürtem “anti-state charges” nung Mongulbarnü aputsü totuyuba agütsüba kuli tejangja lir ta sangdong.

Yoon-i apuba yimten-yimsüsürtem ya Seoul south tsütsü Gwacheon yimti nung aliba detention centre ka nung puoka ayutsü sentong liasü ta Han-i ashi.

Yoon ya maneni tir inyakra martial law sangdongba ama mera tamajung ano agitsü akok ta pai ashi. “Item yagi Republic of Korea aser nüburttem lendong nung yutsür.”

South Korea nungertem ano anogo ka parnok tir indang tia ataa liasü.

Nikongdang tir ya

parliament leni aor ta osang liasü saka pa indang office-ibo yamaji masü ta ashir. Saka opposition MP tem assembly telungi aiba nokdangtsü asoshi adenshia “impeach, impeach” ta ayimtena liasü.

Yoon-i martial law benoktsü merangba ajanga par linük aser South Korea tembar linüktem aser financial markets kanga aoksa.

Paibo “anti-state forces” aser North Korea nungi timtem aliba mechi lir ta ashi. Saka ibai danga kecha agia masü saka par linük telungzük nung yimtenren tsütsü timtem aliba nungi tenzük ta jangja akum.

Ghonda ishika lir iba totuyuba ya melenshitsütet, kechiaser parliament telungi MP 190 yiteta vote agütsütepa agiendaktsü.

Bodhbarnü iba martial law totuyuba melenshitsüba sülen Yoon ya mangur mesüra yimjak nung jembiba mali.

# FIFA Club WC Draw: Real Madrid o Al Hilal külemi lir

**Miami, Luchii/December 06 (Agencies):** FIFA Club World Cup 2025 atema team 32 asayamung tasenba draw asayaba nung European champions Real Madrid CF ya Saudi Arabia indang Al Hilal den asayatsü, Premier League champions Manchester City ya Group G nung ataogo, kong Moroccan side Wydad, UAE nungi Al Ain aser Italy nungi Juventus den asayatsü.

Iba draw ya Miami, USA nung aliba Telemundo Center nung ali, aser Chelsea ya Group D nung Brazil nungi Flamengo, Africa linük nungi Esperance Sportive de Tunisie aser Mexico nungi Club Leon den atar.

Mexico nungi CF Pachuca aser FC Salzburg ya Group H nung aser Brazil nungi SE Palmeiras ya FC Porto, Egypt nungi AlAhly FC aser Inter Miami den Group A nung ataa lir.

Argentina nungi CA River Plate ya Group E nung Japan nungi Urawa Red Diamonds, Mexico nungi CF Monterrey aser Italy nungi FC Internazionale Milano den ataa lir, aser Group C nung Germany nungi FC Bayern München, OFC representative Auckland

City FC, Argentina nungi CA Boca Juniors aser Portugal nungi SL Benfica den külemi lir.

Group B nung Europe nungi Paris Saint-Germain aser Atlético de Madrid, tawa Copa Libertadores takok angur Botafogo aser USA nungi Seattle Sounders FC aser Group F nungya Brazil nungi Fluminense FC, Germany nungi Borussia Dortmund, Korea Republic nungi Ulsan HD aser South Africa nungi Mamelodi Sundowns FC lir.

Team tem ya group ti lemsa aser group shia team pezü lir aser parnok round-robin group stage asayatsü aser temaba jenjang nung aliba ana knockout stages-i aitsü.

Mezüng asaya ya Hard Rock Stadium, Miami nung June 15, 2025 nü asayatsü aser final ya NetLife Stadium, New York New Jersey nung July 13, 2025 nü asayatsü.

#### Group A

- SE Palmeiras (BRA)
- FC Porto (POR)
- Al Ahly FC (EGY)
- Inter Miami CF (USA)
- Group B**
- Paris Saint-Germain (FRA)
- Atlético de Madrid (ESP)

#### Botafogo (BRA)

Seattle Sounders FC (USA)

#### Group C

FC Bayern Munchen (GER)

Auckland City FC (NZL)

CA Boca Juniors (ARG)

SL Benfica (POR)

#### Group D

CR Flamengo (BRA)

Esperance Sportive de Tunis (TUN)

Chelsea FC (ENG)

Club Leon (MEX)

#### Group E

CA River Plate (ARG)

Urawa Red Diamonds (JPN)

CF Monterrey (MEX)

FC Internazionale Milano (ITA)

#### Group F

Fluminense FC (BRA)

Borussia Dortmund (GER)

Ulsan HD (KOR)

Mamelodi Sundowns FC (RSA)

#### Group G

Manchester City (ENG)

Wydad AC (MAR)

Al Ain FC (UAE)

Juventus FC (ITA)

#### Group H

Real Madrid C. F. (ESP)

Al Hilal (KSA)

CF Pachuca (MEX)

FC Salzburg (AUT)

## BILEMDANGANG

"Meitmebang mazüoktetertem aiben lendongi aier."